

73149/923273

3

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1958

—

汾州府志卷之五

城池

府城故汾州城也。元至正十二年，知州朱贊重築，周九里十三步，崇三丈二尺，門四濠深廣不一。明景泰二年修，嘉靖十九年，以東門外居民殷衆，知州張瑄築東郭堡，周九里，崇三丈，門六，二十一年，復築南郭堡，知州曹寵竟其事，周五里十三步，崇三丈，門四。隆慶三年，知州甯策修城，增其高厚，崇凡四丈八尺，下厚四丈二尺，上厚丈八尺，又築北郭堡，周二里有奇，崇三丈二尺，門四。五年，始甃城，萬歷六年，知州張一敬甃東郭堡，十二年。

哈佛大學漢和
圖書館珍藏印

知州白夏築西郭堡周三里崇二丈五尺門四堡皆如城之制。國朝乾隆十七年汾陽縣民賈誠等十六人捐資繕北城三十七丈五尺有奇知縣陶敦仁督修完固。

城邑考云汾州舊城世傳曹魏所築舊志云俗名四陽城言日四面照也又名祝融城者亦此義案水經原公水出茲氏縣西羊頭山東過其縣北酈道元注云縣故秦置也魏書地形志西河郡下云治茲氏城自秦漢至北魏所謂茲氏城者在今府治南十五里然則謂今城創自三國魏不審信也北魏孝昌二年

西河郡僑置平陽界而汾州尋移治西河未知卽治茲氏城與否至唐宋之汾州考之實爲今府治史不詳北徙十五里其城築自何年要在北魏以後矣。

平遙縣城明洪武三年重築周二里有奇崇三丈二尺濠深丈廣丈門六景泰初修正德四年知縣田登修下東門甕城嘉靖十三年水衝壞東北隅十九年舉人雷潔等繕完之三十二年知縣沈振增高西城北城六尺增厚七尺又築北門甕城四十年權理縣事沁州同知呂堯卿增高南城六尺四十一年知縣張稽古因邊警遂甃其城隆慶三年知縣岳維華增臺樓新舊共九

十四甃以甃石濬濠加深廣萬歷三年知縣孟一脈更
治新之二十二年知縣周之度修築東西門甕城國
朝康熙二十三年知縣黃汝鈺因久雨繕其損壞者二
十五丈堞百二十三三十五年知縣王傑修南門甕城
二丈三十六年修東城六丈有奇三十七年修北城四
丈有奇三十九年知縣王綬修西城二丈有奇四十年
修上東門甕城四十一年修北城二丈有奇四十二年
修四門及南城二十餘丈四十三年修南城三十五丈
四十四年修上東門雍正二年知縣高大有修東城四
十一丈有奇乾隆二十七年知縣李在田濬城濠長四

百五十丈

舊志謂尹吉甫北伐玁狁駐兵於此築西北二面傅
合之謬辯見沿革考漢之平陶城在今文水縣西南
二十五里水經注云文水逕大陵縣故城西又南逕
平陶縣故城東又南逕茲氏縣故城東是也北魏徙
置京陵城西以廟諱改爲平遙而漢之故城仍在其
境內後代乃割入文水縣魏書地形志平遙有京陵
城平遙城所云平遙城卽漢平陶故城也然則今縣
城蓋起於北魏耳

介休縣城周八里崇三丈五尺下厚三丈二尺四門濠

深二丈廣二丈東北有堡牆周四里崇三丈門五水門
二明景泰元年知縣王儉彭鏞甃城四門正德二年知
縣郝槃於城之四隅增設小樓嘉靖元年縣民董裳等
於北門外甃甌甃加以鐵柵備水暴漲隆慶元年知縣
劉旁重修增高丈二尺厚增八尺增城臺百一十有奇
及窩鋪萬歷三年知縣康又民築甃城二十六年知縣
史記事增築西門南門外堡牆及東北城上窩鋪十有
四爲樓於東南隅環城設懸樓十有六崇正四年知縣
李雲鴻六年知縣張諭聖相繼繕治城之損壞者十三
年知縣李若星甃城外堡牆因御史張煊所奏請也

國朝康熙十有四年知縣趙端修東城三十餘丈二十
五年知縣李應龍繕城及城上大小樓三十四年知縣
王埴修西城北城甃用甌甃者四十二丈土築者三十
五丈有奇乾隆二十年同知康勳權理縣事修繕南門
二十七年知縣葉楷繕土城十三處通計百一十四丈
及堞二處三十一丈知縣吳步青修西磚城二十一丈
三十三年知縣王謀文設四隅城樓各崇二丈九尺廣
丈有六尺深如之修堞之壞者二十有一及四門城樓
濬濠城東城南因舊濠淤塞濬深七尺廣丈有奇通長
千三百五十一丈城北新鑿濠長三百五十八丈深八

九尺廣丈有五尺而城西舊濠直達於汾者亦久淤濬之長二千七百二十二丈。

山西通志云魏孝靜帝時始建遷朔州軍備禦外患築土爲垣案魏書地形志西河郡介休有介休城是北魏介休不復治漢故城其所置者在今縣東南二十五里元和郡縣圖志云後魏明帝時爲賊所破至孝靜帝更修築遷朔州軍人鎮之因立爲南朔州但領軍人不領郡縣然則北魏之介休縣城宜建自太和至孝靜但修之耳非始建也其城亦在今縣東南而非今之縣治以水經注考之今縣治實漢故城

北齊省介休人永安北周武帝復置殆今縣治自北周以來不復遷改歟。

孝義縣城周四里十三步崇二丈七尺門四東西北有月城濠深丈八尺廣與深等明景泰初典史李進天順間知縣沈純宏治間知縣張日升正德間典史韓彪嘉靖間知縣王錦劉大觀先後修治南門外有堡牆其外自南遶西有外堡牆皆嘉靖間分守冀南道於敖因邊警所築隆慶元年知縣陳情始甃城增高丈餘臺樓俱增於舊知縣陳翰竟其事國朝雍正四年知縣方士模乾隆二十八年知縣張乃曾先後重修三十四年知

縣鄧必安捐俸修西月城五丈五尺及堞六處。

山西通志云魏文侯時建元魏孝靜帝武定元年移置西北隅築今城案元和郡縣圖志魏移西河郡中陽於今理而水經注勝水東逕中陽故城南又東合文水今城南俗呼孝河者即水經注之勝水以地望考之縣城即魏晉中陽故城也其曰魏文侯時建傳合之謬辯見沿革。

臨縣城周六里五步崇三丈嘉靖二十一年所築前此元至元五年己卯臨州治南徙四十里是為今縣治州治雖遷而無城明景泰元年知縣劉本始築小城僅有

東南二門正德八年知縣杜敏增置外城東西設水門以洩山澗之水今城拓於嘉靖中兵備趙瀛於是甕城臺樓堞鋪俱備二十九年知縣張天祿於南北增置臺樓東南北浚濠廣深丈有奇隆慶元年知縣吳潮修城用石砌東南北三面萬歷十九年知縣張問行修敵臺攔馬墻浚其濠二十三年知縣常時芳於東城外內築臺各二甃以甃甃建亭其上四十八年知縣諸葛昇修城西門國朝順治間知縣謝道陳顯忠朱紹鳳張勸康熙三年知縣余維樞十四年知縣莊搢先後相繼修繕三十三年城東湫水不由故道衝損城郭日就頽圯

乾隆三十一年春知縣丁宗懋汾陽縣知縣朱濬孝義
縣知縣王椿分工段督修明年九月工竣

今縣治卽元至元五年所徙之臨州治

石樓縣城唐武德二年所築明景泰元年縣丞耿祥重
修周一里九十六步崇二丈五尺南北二門南城外有
外城爲東西二門合內外城周三里三十步城外因山
澗爲濠阻深足恃而水暴漲時亦爲城害國朝順治
十六年知縣周士章修治改北門舊在東北移之於正
北康熙八年知縣任珩雍正四年知縣麥士偉七年知
縣袁學謨先後修繕八年復修南城

永寧州城故石州城也周九里三步崇三丈五尺濠深
丈二尺門三元至元二十一年河南行樞密院八元愷
郡守尹炳重築明景泰元年知州范賓嘉靖二十年知
州楊潤先後修繕隆慶間巡撫楊巍以遭兵火後城廣
人稀遂截東南半壁新修築之崇四丈八尺下厚三丈
二尺上厚丈有五尺浚其濠萬歷三年始甃城知州李
春芳劉祐高光陳嘉謨許天球先後董役越五年而工
竣甃城臺樓堞鋪俱備二十六年知州夏惟勤修城徙
南門於東南隅增設臺樓崇正十四年知州仇秉忠更
深其濠國朝順治十四年知州胡朝賓修西城康熙

十二年府通判署州事黃良驥修東城十九年知州馬雲瑞五十九年知州朱价先後修繕

舊志云秦丁巳三年趙武靈王破林胡樓煩始築案趙世家武靈王曰我先王取藺郭狼敗林人於荏而功未遂今西有林胡樓煩秦韓之邊張守節云林胡樓煩卽嵐勝之北也嵐勝以南石州離石藺等七國時趙邊邑也秦隔河也又武靈王二十年西畧胡地至榆中林胡王獻馬州境本藺離石郭狼之地爲趙邊邑已以前此成侯三年魏敗趙藺二十四年秦攻趙藺肅侯二十二年秦取趙藺離石武靈王十三年

秦拔趙藺非由武靈王破林胡樓煩始有其地甚明其所謂秦丁巳三年者亦不可通考秦昭王三年當周赧王之十一年趙武靈王之二十二年歲在丁巳此稱秦丁巳三年殊不成辭

寧鄉縣城周五里百八十步高三丈門三明景泰元年知縣梁杲所築正德六年知縣石祥重修浚其濠深二丈嘉靖二十一年知縣王一言始設敵臺三十五年知縣賈迪增樓堞及窩鋪隆慶二年知縣李卿修城增高五尺厚增八尺城北鑿重濠廣二丈深二丈五尺三年知縣吳三聘築甕城萬歷二年知縣白經於西北隅建

棚舍八十有四。三年知縣公一揚重修。三十五年知縣
廖得寶始甃城。國朝順治六年知縣史具勲修城之
西南隅。八年知縣王之儀修東南隅及樓。

官署

府治在南城少東前明萬歷二十三年設府以舊守備
署改爲府署自堂及廡舍如制內住宅頗促三十年知
府崔士榮建後樓五間閱今百六十餘年未經大修內
堂東西兩廡則余蒞任後捐俸繕葺而崔守所建後樓
亦久廢圯求其完整可居尙有待云治西爲舊清軍廳
理刑廳司獄司廢署地今署內之右南向三間顏曰居

易齋東向三間顏曰以勤補拙卽清軍廳址也。

清軍廳舊在府治西康熙二十七年移駐介休縣城卽
居舊分署乾隆二十一年又移駐張蘭鎮以所裁之巡
檢司署改爲同知署。

管糧廳在府治東垣墻及署內東廡歲久傾圮乾隆三
十年通判劉望齡捐俸修整。

經歷司在管糧廳之南二堂歲久欹側後宅傾圮無存
乾隆十六年經歷毛麟捐俸建住宅三間東廡四間西
一間二十五年三十年漸次修整二堂及東西餘房。
汾陽縣署在東門內大樹北初爲稅課局明永樂十一

年改爲州治。正統十二年，知州李善重建。成化六年，知州伍秀建左右鐘鼓樓。嘉靖二十八年，知州李當萬歷十二年，知州白夏相繼修繕。二十三年，設汾州府，卽以州治爲倚郭。汾陽縣治。二十五年，知縣蔡成已修。國朝順治十一年，知縣吳世英修大門及鐘鼓樓。康熙間，知縣趙其星、平士楨先後重修。

典史署在縣治西。康熙四十八年，典史李錦重修。

提督學政察院在縣治西。明天啟二年，汾州府同知柳白卿、通判溫毅然、曹祖功、永寧州知州沈復禮、汾陽縣知縣李作乂、平遙縣知縣楊廷謨、介休縣知縣孫磬石。

孝義縣知縣閻夢夔共捐俸建。國朝乾隆六年，縣人候選知州郭建瑄捐銀三千七百五十餘兩重修，更增拓考棚。

冀村巡檢司在縣北四十里。本設在黃蘆嶺。順治六年，署燬，遂僦居城內。康熙五十二年，以守備舊廨分作巡檢驛丞官署。雍正四年，巡檢驛丞並裁汰。七年，復設黃蘆嶺巡檢司。以未建衙署，仍居城內舊廨。乾隆二十一年，改駐冀村，卽將舊廨移建。

舊志：察院在師垣坊。初御史案臨署。按察分司嘉靖三年始改。淨心寺爲之分守冀南道。在察院東。初爲

布政分司每歲行部暫一居之嘉靖初定坐鎮於此遂開府焉分巡冀南道在察院西布政分司在察院南偏東按察分司在察院南偏西公館在分守道南長盈倉在師垣坊陰陽學在城東門外醫學在城南門內僧綱司在天寧寺道紀司在城隍廟汾陽縣志分守冀南道缺裁署改黃太僕祠分巡冀南道缺裁署廢知府張奇抱改建龍亭公館今改棠蔭書院

平遙縣署明萬歷十九年知縣何其智改大門上建譙樓及門內之左建寅賓館二十五年知縣周之度修大門外觀風樓四十七年知縣楊廷謨建儀門及東西角門二十八八年又修賦役房國朝順治十二年知縣汪麗日重修鐘樓

典史署在縣治西

山西通志察院在縣治西南知縣王綬改建西河書院按察分司在縣治東平遙縣志陰陽學醫學俱在縣治左路北僧會司在太子寺道會司在大興觀

介休縣署元至元中縣尹閻梅建明洪武二年縣丞雷震修萬歷十九年知縣王一魁修正堂及寅賓館舊三間俱拓爲五間國朝康熙十六年知縣李試重建堂臺繞以石闌二十四年又置甃洞於儀門外建樓其上

典史署在縣治西。

舊志察院在西街東察院係舊布政分司在東街分守道在東察院東分巡道舊州館俱在西街張蘭鎮又有公館及冷泉關公館冷泉屬靈石往過官自介休南者介休候之自孝義南者孝義候之二縣同修察院一所僧會司在崇慶寺道會司在保陽觀山西通志清軍總捕分署卽察院東分守道署介休縣志在城公館卽清軍總捕分署。

孝義縣舊署燬於元初至元二十四年縣尹王恕重建大德七年地震圮八年縣尹郝思敬復建明天順二年

知縣王佐宏治六年知縣張日升重修正德間知縣閔以仁築方臺於儀門外上建樓二層虛其下以通出入後廢改爲外門三間。國朝康熙四十八年知縣高佩建後樓。

典史署在縣治東。

舊志察院在縣治東布政分司在中陽樓東孝義縣志冀南道行署在宣化坊西縣署南有南館又明嘉靖中劉大觀建候館於南鄉之王屯村俱廢。

臨縣署元知州馬麟建。國朝順治六年燬九年知縣朱紹鳳改建於舊治之南康熙十二年知縣常來譽更

增拓之闕二年。知縣莊搢莫友仁相繼繕葺。規模始備。五十九年。知縣楊飛熊重修。

典史署舊亦遭燬。康熙五十六年重建。今縣治西。

舊志布政分司在縣治南。按察分司在外城南門內。醫學。知縣常時芳建。僧會司在普化寺。山西通志布政分司在文廟西。按察分司在真武樓東南。今俱廢。石樓縣署。明洪武六年。知縣顧碩建。崇正五年燬。十年。知縣熊時泰重建。國朝順治十三年。知縣周士章。雍正七年。知縣袁學謨增修。典史署在縣治東。

山西通志。察院按察分司俱在治東。今廢。石樓縣志。僧會司在永慶寺。

永寧州署。元至正二十年建。明隆慶元年燬。權州事太原府同知李春芳請於上官。以治西遺址給民納粟爲業。又截其中爲官倉。所餘地合兵備道廢署地。改建今治。歷任隨時捐俸修繕。

吏目署在州治西。乾隆二十三年。吏目蕭應璉捐俸修方山堡巡檢司。在州北百五十里。

柳林鎮巡檢司。在州西六十里。本青能渡巡檢司。駐青龍鎮。乾隆三十三年。改駐柳林鎮。

舊志府館在州治東醫學僧正司俱在州治東道正司在州治北山西通志察院在州治北廢

寧鄉縣署金泰和中建明宣德中知縣劉岳重建宏治中知縣曹鐸修 國朝順治八年知縣王之儀康熙二

十四年知縣龔應霖重修

典史署在縣治西

舊志布政分司按察分司府館俱在縣治東陰陽學在縣治南僧會司在清涼寺道會司在元都觀

倉廩 養濟院附見

汾陽縣預備倉在天寧寺後凡五間康熙五十八年知

縣周超於縣治之右復建新倉

舊志預備倉一在天寧寺後一在縣學東養濟院在縣治西北考前明縣學在城外東關立信廂縣學東之倉其廢已久

平遙縣預備倉在縣治內公廨北常平倉舊在縣治東康熙三十四年知縣王傑建凡五間雍正五年知縣高大有重建於縣治西凡三十八間九年知縣梅廷誨捐俸增建六間乾隆五年知縣顧之麟請修繕縣治東舊倉五間增建十間名恩預倉

養濟院在下西門內路北歲久傾圮康熙十一年知

縣陳以恂捐俸重建。四十八年。知縣王綬。乾隆十一年。知縣李由中。俱捐俸重修。

介休縣預備倉。在東街路北。明萬曆十八年。知縣王一魁。建。二十七年。知縣史記事。增高墻垣。易土以甃。倉門建樓。以便防守。國朝康熙三十二年。知縣王埴。重修。雍正二年。縣富民捐穀三十石至五百石以上。卽於各村設社倉貯之。凡百有四處。乾隆十二年。富民捐設義倉。凡五處。

養濟院。在宣化街南。明洪武間。知縣柳元泰建。國朝康熙間。知縣王埴。修。雍正二年。縣人趙祚焯。於城

東趙家茶坊西。捐地建普濟堂。縣志。順城關東門內路北。有育嬰堂。亦是年建。

孝義縣常平倉。一在宣化坊倉巷街北。凡窰廩十四間。房十八間。一在縣署東。新舊廩各三間。

養濟院。在橋南廂街西。普濟堂。在北稍門外路北。育嬰堂。在南稍門外路西。

臨縣常平倉。一在縣治東。康熙二十八年。知縣莫友仁建。一在治西。康熙五十九年。知縣楊飛熊建。以後歷任知縣隨時捐俸修拓。

縣舊有預備常平二倉。明季遭兵燹。俱燬。又養濟院

康熙二十四年知縣莫友仁建後廢五十六年知縣楊飛熊重建於內城南門外之西。

石樓縣常平倉在縣治東凡窯廩十一間房六間雍正七年知縣袁學謨建神倉於先農祠內常平倉亦前後修拓。

養濟院在東門外雍正七年知縣袁學謨建永寧州預備倉一在州治西凡三十間一卽玉亭驛驛丞廢署改建凡二十三間一卽州判廢署改建凡八間歷任知縣隨時捐俸修繕。

舊志養濟院在州治西北。

寧鄉縣常平倉在縣治東雍正六年知縣邵之楷建凡窯廩十間乾隆八年知縣吳錯增房六間三十年知縣朱懋炳又增九間。

舊志社倉一在縣治北一在朱家店一在仙明都養濟院在慶豐門外俱廢。

學校

汾州府儒學在同節坊卽明慶成王府國朝順治十七年改建而以舊府學爲汾陽縣學祭獻禮儀悉依會

典凡府州縣學皆有大成殿明倫堂尊經閣戟門泮池此定制也不別爲目。

崇聖祠在明倫堂之西舊稱啓聖公祠雍正三年

欽改爲崇聖祠追封 孔子五代王爵

名宦祠在泮池東

鄉賢祠在泮池西

舊志汾州府學田學道周買置地八十一畝離城十五里每歲除納糧外該徵租二十石二斗五升守道徐學道周批發地五十畝坐落中寨西北係郭裕絕產每歲除納糧外交納租谷五石以上守道徐買置地九十一畝坐落上文里每歲除納糧外交納租課二十石二升地七十七畝坐落肖莊里每歲除納糧外交納租課十六石以上今見在學田凡十處田村

六十四畝蕭家塋七十七畝小北堡八十一畝東馬賽五十畝桑棗坡九十二畝堡城司三十三畝栗家莊十八畝文家莊四畝冀村四畝路家莊九畝又社學地二處孫家莊十畝犬回頭十七畝三分亦舊歸府學通共四頃五十九畝三分而歷年爲承種者隱匿過半宜悉歸學勒石以備修聖廟給貧生之費大成殿東廡有金翰林修撰王廷筠行書詩石四乃明嘉靖中重摹者其舊石在州學泮池西黃華亭漫滅不存東廡壁間又有宋元祐二年黃庭堅書真覺道人歌石二其一有斷痕而絕不傷損蓋明藩府中

汾州府志 卷五
舊物也。

汾陽縣儒學在師垣坊卽舊汾州儒學金同知節度使康玉潤重修後燬於兵元初漸次修舉明洪武間知州郝志道正統間知州李善相繼重修正德十六年知州郁浩復增鑿內外泮池萬歷十二年知州白夏重加修拓二十三年設汾州府改州學爲府學知府崔士燾趙喬年文養浩繼修而新設倚郭汾陽縣則別建縣學於城東國朝順治間改建府學於同節坊康熙十五年知縣崔秉政議縣學亦宜置城內於是以舊府學改爲縣學大加繕治。

崇聖祠在尊經閣後。

名宦祠在戟門外之左。

鄉賢祠在戟門外之右。

明倫堂後嘉靖中建敬一亭時翰林學士顧鼎臣進講宋儒范浚心箴因御製敬一箴及注范氏心箴程子視聽言動四箴命兩京國子監及天下學校建亭勒箴萬歷十二年知州白夏建三賢祠於啟聖祠左祀子夏段干木田子方而舊志稱知縣尹覺民導馬跑泉水至馮家莊架以木槽由西關入城至鼓樓南引入府學泮池所云府學卽今縣學也

舊志汾陽縣學田無糧地一項每年額徵秋租穀葛三十五石有糧地一項每年秋租穀葛三十五石於本年租內照依時值變納糧差又有糧地一畷九分八釐四毫每年除納糧外額徵租穀四斗又守道徐學道周批發地五十畷係郭裕絕產每歲除納糧外交租穀五石守道徐買置地十七畷五分坐落西關南一里下舍村每歲除納糧外交納租課六石三斗二升五合地十五畷坐落北關北三里堡城司每歲除納糧外交納租課五石以上汾陽縣志云地四段坐落小相西里每歲除納糧外交租七石五斗又云

原設學田共地二頃六十一畷有奇糧十五石一斗九升五合有奇又房舖三所每歲賃銀三十餘兩

縣志載宋元豐三年賜太師文彥博詩勅并序其碑石在學中

平遙縣儒學舊在治東嘉靖八年以縣治東南太子寺更之隆慶四年知縣崔元吉六年知縣孟一脈相繼捐俸建尊經閣萬歷十九年知縣何其智二十五年知縣周之度二十九年知縣魏學徵四十六年知縣楊廷謨先後修拓崇正九年知縣王凝命復以文廟與太子寺互更國朝康熙十四年知縣魏裔愨按嘉靖八年以

後移改三十九年知縣王綬捐俸重修增鑿泮池

崇聖祠在敬一亭西

名宦祠在戟門外之左

鄉賢祠在戟門外之右

舊志先師廟舊在治東嘉靖八年巡按穆公準呈以

平前太子寺更之平遙縣學田凡地一項七十八畝九

分九釐每斗額徵租穀十二石一斗一升租銀一兩

九錢三分五釐平遙縣志學田共地二項八十七畝

每歲徵租粟二十二石四斗五升三合五勺徵租銀

一兩九錢三分五釐

介休縣儒學在城內東南隅舊在縣治東建於唐咸亨

三年金之季燬於兵元至元初知縣閻梅買民居為奉

祀所九年知縣梁天翔以其故居為講堂而建大成殿

於前未訖代去三十年主簿王益率士民竟其事適知

縣田澤蒞任遂贊成之工竣於元貞初明洪武二十七

年知縣武信天順間知縣王澤正德六年縣丞張敬十

年知縣趙膺隆慶三年知縣劉旁六年知縣高鈞萬歷

三年知縣康又民十八年知縣王一魁二十五年知縣

史記事四十二年知縣孫瓚崇正初知縣何騰蛟前後

修拓規模始備其後生員董爾型重修國朝順治間

爾型之孫復修明倫堂尊經閣康熙間貢生梁錫珩修尊經閣其子復修三十五年知縣王埴修大成殿

崇聖祠在明倫堂之東

名宦祠在泮池東

鄉賢祠在泮池西

忠孝祠在學宮西雍正元年知縣單含奉文建

節義祠在學宮西雍正元年奉文建

舊志介休縣學田共地八十八畝六分有奇每年額徵租穀四十七石三斗介休縣志學田共地七十二畝五分有奇每歲徵租穀三十二石七斗視舊數爲

減

孝義縣儒學在城東南隅宋大觀中知縣事董元愷建元元貞二年縣尹董完澤修大德七年地震圯八年縣尹郝思敬重建工未竣至大元年始繼成之明洪武十一年知縣陳莊天順五年知縣沈純成化五年知縣王佐宏治二年知縣張日升正德十年知縣閔以仁十三年知縣張友直嘉靖間知縣張愷萬歷二十八年知縣周佑三十五年知縣劉令譽相繼增修國朝乾隆三十四年知縣鄧必安修

崇聖祠在大成殿東北

名宦祠在戟門外之左。
鄉賢祠在戟門外之右。

忠孝祠在學宮東北隅。祀孝子鄭興。舊在北門內。康熙五十五年。知縣閔衍建。乾隆十五年。知縣李方沁移建於學宮東南隅。改舊祠爲節孝祠。乾隆三十四年。知縣鄧必安建文昌閣於大成殿東。以舊文昌祠爲今忠孝祠。

節孝祠在城北門內。祀節婦蘓氏。乾隆十五年。知縣李方沁改忠孝祠於學宮內。而以舊祠爲節孝祠。

舊志。孝義縣學田。明萬歷中。邑紳士霍鍾瑜捐置地

一頃二十四畝七分八釐。每歲除納糧外。額徵租銀四兩七分八釐。孝義縣志。康熙四十六年。署孝義縣

知縣阿爾布。捐置地三十畝。共一頃五十四畝有奇。

臨縣儒學在縣治東南。元至正間始建學於東郭。明永樂十六年。以河患改遷東南。去舊址二里許。嘉靖三十五年。知縣脫鎬。因廟學瀕河。議遷今所。萬歷二十六年。知縣常時芳修。崇正六年。燬於兵。國朝順治三年。知縣謝道修。康熙二十七年。知縣莫友仁重修。增建尊經閣。

崇聖祠在文廟東。

名宦祠在戟門外之左。

鄉賢祠在戟門外之右。

舊志臨縣學田知縣張問行及縣丞魏賓置地一頃

六十八畝八分三釐每歲額徵租穀十一石五斗三

升為給貧生婚葬之助臨縣志康熙間知縣莫友仁

買甘泉都地二頃六十四畝樂禮都地三頃一十一

畝善訓都地一頃七十七畝為貧生助

石樓縣儒學在縣治東金時重建明洪武初知縣顧碩

修正統十一年知縣劉述景泰五年知縣馬榮嘉靖五

年知縣王仁相繼修拓崇正末燬於兵國朝順治十

年知縣周士章重建教諭姜肇周董其事康熙二十五

年知縣趙鳳集二十八年知縣王許三十一年知縣高

必遴三十五年知縣趙鳳集五十二年知縣韓貽豐雍

正六年訓導宋國相九年知縣袁學謨相繼重修

崇聖祠在文廟西

名宦祠在戟門外之左康熙五十四年知縣韓貽豐建

鄉賢祠在戟門外之右

石樓縣志學田東門外地七畝一分

永寧州儒學在州治東南明洪武七年知州時應祥修

拓宏治十年大成殿災知州王道重建正德二年復災

知州張克恭重建嘉靖二十八年西自民舍延燬知州
崔嘉重建隆慶元年燬於兵署州事李春芳重建萬歷
二十四年知州夏惟勤重修國朝康熙十九年知州
馬雲瑞雍正五年知州周鑲重修

崇聖祠在文廟左

名宦祠在戟門外之左

鄉賢祠在戟門外之右

舊志學田城外東南隅地十二畝該應貢生員輪耕
用助赴京路費後廢萬歷三十六年以柏木變價買
地五十畝五分該夏秋糧一石七斗五升一合七勺

州志云其地坐落鳳山底馬茂莊西崖底三處地租
散給貧生

寧鄉縣儒學舊在縣治西金大定間縣尹劉文通修以
後屢經修治其地面山背壑嘉靖六年巡按穆相檄知
縣張軾擇地於縣東南移建萬歷間知縣楊正達修崇
正末燬於兵國朝順治八年知縣王之儀教諭范星
鼎訓導張天秩重建康熙三十八年知縣呂履恒修

崇聖祠在文廟左

名宦祠在戟門外之左

鄉賢祠在戟門外之右

忠孝祠節義祠俱在縣署東雍正五年知縣孔興唐建
以上文廟崇聖祠及名宦鄉賢忠孝節義祠

汾州府教授宅在射圃前訓導宅在其右

汾陽縣教諭宅在尊經閣東訓導宅在尊經閣西

平遙縣教諭宅在文廟東訓導宅在文廟西

介休縣教諭宅在明倫堂東訓導宅在明倫堂西

孝義縣教諭宅在明倫堂後訓導宅在其左

臨縣教諭宅在文廟東訓導宅在其右乾隆三十年訓
導郭金城捐俸八十餘兩修繕

石樓縣訓導宅在文廟東

永寧州學正宅在射圃東訓導宅在其左

寧鄉縣訓導宅在文廟後

以上學署

西河書院在府治東南舊名棠蔭書院康熙二十四年
知府張奇抱建乾隆十二年知府魏元樞於汾陽縣願
捐素積案內撥銀三千兩每歲收息銀三百六十兩又
自捐養廉銀五十兩及八屬各捐多寡不一歲成六百
兩爲延師置弟子之費十八年知府顧鴻重修復撥銀
三千五百兩合前共六千五百兩每歲收息銀七百八
十兩以充束修膏火經費免州縣捐助

白公書院舊府志云在啟聖祠西。

仰高書院舊府志云在縣治西嘉靖元年督學周宣命

知州張鉞卽狄公祠隙地建祭政李元題名仰高宜仰

子夏之文狄公之武也五年知州郭鏗增拓上二所舊志屬之汾

州府其廢已久

文昌書院舊府志於汾陽縣云在學前府通判王重光

署縣事議建

卜山書院汾陽縣志云在城北二十里大相村名子夏

祠勅額卜山書院後以遠在郊野因學宮旣成卽於西

偏創立書院仍以下山名之

汾陽縣義學志云在府署西知府劉克孔建順治十六

年分守冀南道申偉抱捐俸置於府西不數武康熙五

十五年知縣平士楨重整五十八年知縣周超捐俸延

師聚徒講肄其中

卿士書院平遙縣志云在上東門內路北卽卿士廟

西河書院平遙縣志云在縣治西南康熙四十二年知

縣王綬捐俸創建四十七年置地一頃九十四畷七分

五釐充供給租課

平遙縣社學志云合城內外凡十所並知縣王綬設一

在下東門外一在遊駕村一在香樂鎮一在洪善鎮一

沙州府志 卷五
三
在武村一在岳壁村一在陳家莊一在寧固阜村一在王家莊一在杜村義學在縣治東南康熙二十二年知縣黃汝鉅建設田尹村馬鋪民地四十畝七分一釐輸租二十石三斗五升五合二十六年增置上西門外五里民地二十七畝一分三釐租十三石五斗
景賢書院舊府志於介休縣云在東南城上年久拆毀
三賢書院舊府志於介休縣云在郭林宗祠今廢
縣山書院介休縣新志云本育才館明萬歷間知縣史記事建歲久傾廢今知縣王謀文卽其址改建書院
介休縣義學志云一在順成關本明知縣李若星祠

國朝雍正元年知縣單含改設義學置地三十餘畝龍峪村義學康熙六十年縣人任復裕捐建置地二十四畝有奇一在中街村縣人趙承舜捐建置地八畝銀三百餘兩地租銀息以充膏火一在張蘭鎮乾隆二十二年撤西街義學建巡檢署卽以公館改爲義學

孝義縣義學志云縣人霍鍾瑜捐置又北關義學卽鄭孝子祠康熙五十三年知縣閔衍設雍正二年知縣方士模重設三年又設南關義學於南山門上乾隆二十一年知縣莊行恭建義學於外城內東南隅

鳳山書院臨縣志云康熙二十七年知縣莫友仁置

臨縣義學志云康熙二十四年知縣莫友仁置石樓縣社學山西通志云在文昌祠前

永寧州書院志云舊爲義學乾隆二十九年知州蔣龍昌修拓改爲書院

寧鄉縣義學志云知縣龔應霖建社學在察院址東以上書院及義學社學

壇壝

社稷壇汾陽平遙二縣在城北之西介休縣在城西里許臨縣永寧州在城西孝義石樓寧鄉三縣在城北壇之制方二丈五尺崇二尺一寸階三等周以垣四門位

北嚮瘞石於南以表位不至側二尺五寸東西取中社右稷左石長二尺五寸方尺其瘞之也惟石之頂見於土上主以木長二尺四寸廣六寸丹之青字書某州縣社之神稷亦如之座厚五寸廣九寸有半祭用春秋二仲月之上戊制帛二黑色鉶一簋二籩二豆籩各四羊一豕一

風雲雷雨山川城隍壇州縣各設壇於城內南嚮祭亦以春秋二仲月之上戊位三中風雲雷雨之神左山川之神右城隍之神制帛七色白其餘如社稷壇

厲壇州縣各設壇於城北南嚮祭以清明日及孟秋之

望孟冬之朔迎城隍神位於上以主之位境內人鬼之無所歸者於左右。

先農壇州縣各於東郊祭用仲春亥日。

城隍廟一在汾陽縣治之西北本汾州城隍明萬歷二

十三年改州為府是為府城隍一在縣治西為縣城隍

平遙縣在縣治東介休縣一在縣治東里許一在張蘭

鎮孝義縣在縣治西北臨縣在縣治西南永寧州在州

治北寧鄉縣在縣治北明洪武初封天下城隍之神府

曰威靈公州曰靈佑侯縣曰顯佑伯二十三年改正祀

典府城隍曰本府城隍之神州縣亦如之以春秋二仲

月之上戊合祭於山川壇每朔望肅謁行香凡遇水旱災患則禱之。

八蜡廟汾陽縣在城東之南介休縣在城東南隅孝義

縣在城西臨縣設壇於南壇之西石樓縣在城東舊列

於祀典乾隆十一年停止。

馬祖廟汾陽縣在城東平遙縣在洪善驛介休縣一在

縣治之東一在城北孝義縣在儀門之右臨縣在城東

石樓縣在縣治東永寧州在州治東北。

旗纛廟一在府城內一在寧鄉縣歲以霜降日祭軍牙

六纛之神以上四廟皆當壇祭者故附見於此不列祠廟內。

汾州府志卷之六

關隘

府西羣山簇擁自北而南西四屬臨永寧寧鄉石樓在
 山脊之西西抵黃河地勢東高西下故臨永寧之水南
 流西流過寧鄉縣東薛頡之西以南枝麓廻環故寧鄉
 石樓之水北流西流胥歸於河東四屬汾陽孝義在山
 脊之東右山左汾地勢西高東下故二縣西境之水東
 流平遙介休汾川行其西北太原以西之山環而至乎
 其南地勢南高北下故二縣南境之水北流胥注於汾
 而汾川纏絡之墟則東西原隰之所合也西控河山之

汾州府志 卷六
險戰國時秦趙相持趙守河東以據秦其險要在藺離石今永寧州境也東漢之季西河郡徙治離石日益多事降及魏晉匈奴五部之衆散居是間迨劉淵發難始於離石而東逼太原南奪平陽自時厥後中原非晉有也北魏之初西河離石吐京並置重鎮然餘寇竊發歲有兵事幾與魏終始周齊爭勝河汾間郡常爲兵衝隋大業末唐乾符以後太原南指未有不以是地爲中頓平陽北向未有不以是地爲啟途者也宋扞西夏明防韃靼府西爲必虞之地我朝直北而西蕩然無外是以昔時關隘聊記其地用知古今而已

臨縣西百二十里曰克虎寨黃河東岸路通陝西葭州古置浮梁今以舟濟金大定中曾於此地築城戍守以防夏人明洪武五年置巡檢司後裁

臨縣堡寨九曰三交寨鐘底寨堡子峪曲峪寨開陽寨杏林莊堡子城第八堡白文鎮鎮集二十有一曰三交鎮沙源集招賢集白文鎮兔兒坂曲峪鎮叢羅峪清涼寺安家莊侯家圪台十寨樓子卯大窰村石堞山崖頭村白道峪武家窰甲頭村下卯頭沈家溝苗家卯

永寧州北百五十里曰方山堡金貞祐中方山縣所徙

治也。時鎮西節度使古里甲右倫言欲分石州兵五百，權屯方山，勦殺土寇，且備嵐州，而同知蒲察桓端拒而不發。明萬曆二十五年，巡撫魏允貞以方山乃三晉要害之地，三縣不接之所，請復築城池，建察院一，府署一，鎮守衙一，倉庫一。築城時，掘得太和八年縣印一顆，解布政司寄庫內。國朝雍正八年，巡撫石麟以方山堡在州治正北百五十里，舊設巡檢，裁汰已久，但永寧北境遼遠，叢山錯雜，請增設方山堡巡檢一員。州北二百二十里曰赤堅嶺，明洪武三年置巡檢司，今廢。

州西北六十里曰石門，明隆慶元年九月，俺荅兵由石門入石州，俗呼石門塢。又西北至臨縣治亦六十里。州西少北百二十里曰孟門鎮，周大象元年於此置定胡縣，隋置孟門關，其地險固。唐貞觀二年改縣曰孟門，元置離石巡檢司於此，城垣廬舍不減於舊。明改爲孟門巡檢司，後廢。州西少南百二十里曰青龍渡，舊設巡檢司，駐青龍鎮。乾隆三十三年改駐柳林鎮。

永寧州堡二十，曰四皓堡、吳城堡、李家灣堡、大高家溝堡、塞東堡、香巖堡、穆村堡、薛村堡、禦寇堡、雙霧都

堡神底堡大武鎮堡石門堡南村堡峪口堡橫泉堡
津良堡方山堡樹林堡赤堅堡寨一曰尖陽山寨鎮
集七曰吳城鎮金羅鎮青龍鎮柳林鎮孟門鎮大武
鎮峪口鎮趙吉士守險分永靖交山議云晉省以太
原爲腹心而交靜諸山逼處太原右腋西極黃河盤
亘千餘里其中若神師羊腸孝文呂梁劉王暉管涔
蘆芽離石石峽鹿徑兩嶺周洪諸山皆前古所稱名
區天險是趙武靈王闢之以爲強劉淵都之以定霸
者也歷考前代交境西北常列爲雄鎮宿以重兵唐
於岢嵐置岢嵐軍宋於靜樂置靜樂軍於嵐縣立節

度使元於靜樂置河北都元帥府明初靜樂兩嶺關
婆婆嶺隘皆以太原左衛兵分屯守險自唐至明往
往加意於此數百里之內夫險固之地雖數十里尙
足容賊況列嶂連雲莫知紀極交靜諸山旣雄峻四
越其民又生長崖谷勇健輕生交西北與臨嵐永寧
界其山若孝文呂梁劉王暉皆絕險東北與靜樂陽
曲界其山若神師羊腸交山皆絕險盜由此出沒案
吉士此議於西北山險頗屬明切附錄其語以見梗
槩

寧鄉縣西百五十里曰三交原其地舊有城俗呼吳王

城下臨三交口渡。蓋古戍守處。

縣南四十里曰泉子關。明嘉靖二十一年五月，山西巡撫令隰州知州何繼武防西路寇，通平陽於泉子山南崖砌石墩一，高七丈，廣四丈，長八丈。北崖砌石牆一，高六丈，長二十二丈。又於山澗中樹椿木，惟通其流。兩山置卒千餘人戍守。

泉子山備禦碑記云：東通於平陽者，靈石之郭家溝是也。西通於平陽者，寧鄉之泉子山是也。東路斷，則靈石池南無憂；而平陽之左備以固，西路斷，則寧鄉池南無憂；而平陽之右備以固。案此雖專為平陽備

禦，而其地屬寧鄉，故附錄之。

縣南五十里曰寧鄉關。寧鄉水自孝義縣西流，池北逕關下。

寧鄉縣鎮集六，曰暖泉鎮、娑陀店、朱家店、鋤溝鎮、青

龍鎮。

永寧州寧鄉縣交界。

三交原。

石樓縣西北九十里曰上平關，即唐書地理志之上平津也。下臨黃河。五代梁開平二年，李茂貞遣延川帥胡敬璋攻上平關，為梁將劉知俊所敗，即此。明洪武十三年置巡檢司，後廢。

縣西八十五里曰永寧關，西臨黃河。宋史地理志：石樓

縣下云有上平永寧二寨明洪武初置巡檢司後廢

崇正六年十二月秦賊盡入晉豫至數十萬而延綏

賊首鑽天哨開山斧據永寧關前阻山險下臨黃河

負固數年不下延綏巡撫陳奇瑜潛師疾走入山縱

擊斬首千六百級二賊死分兵擊賊首一座城斬之

延綏盜悉平奇瑜威名著關陝石樓縣志云河西清

澗縣水賊乘間竊發明季設守備把總駐防於花地

窰等處

縣東北六十里曰窟龍關後魏吐京郡之嶺東嶺西二

縣以關之山險分也明洪武初置巡檢司後裁

周士章議云黃雲山縣亘三十餘里林樹茂密地界

於孝隰寧石之間中有窟龍關天成險隘萬壑莽蒼

凡起解錢糧傳遞公文必由斯道而四外並無撥兵

宜於關內界碑處所安撥兵十數人更番防守

石樓縣堡四曰管頭堡解家堡華城堡南嶺堡墩二

十曰二郎墩西嶺墩東莊墩王村墩胡家墩四江墩

管頭墩薛家墩薛張墩轉角墩閻家墩崖頭墩下窰

墩

汾陽縣西六十里曰黃蘆嶺北魏武定二年齊獻武王

出北道度赤洪嶺以斛律金為南道軍司由黃蘆嶺出

會於烏突戍。北齊天保三年，幸離石，遂至黃蘆，起長城四百餘里，立三十六戍。胡三省以爲此長城蓋起唐石州，北抵武州之境。明宣德四年，設巡檢司。國朝順治六年，署毀，僦居城內。雍正四年，裁。七年，巡撫覺羅石麟以黃蘆嶺地屬險要，復設。乾隆二十一年，移駐冀村。縣西三十里曰金鎖關，在向陽峽，岩險插天，中斷如闢。爲汾石咽喉，漢晉以來戍守處也。明初置巡檢司，尋廢。隆慶元年九月，俺荅軍由向陽峽分掠孝義介休平遙隰州等處，復移兵汾州城下，攻八晝夜不克，乃引去。因增築關城，設兵防禦。

汾陽縣堡二十有九，曰望春堡、喬東堡、故顯堡、太平堡、大相堡、小相西堡、小相東堡、盡善南堡、盡善北堡、羅城堡、董寺堡、黑浮堡、仁岩堡、里仁堡、康家堡、西豐堡、孝臣堡、陽城堡、靳同堡、田同北堡、田同南堡、鞏村堡、三泉堡、任家堡、趙家堡、馬莊堡、見喜堡、中干堡、田村堡。寨十有九，曰東馬寨、西馬寨、暮莊寨、三泉寨、張多寨、趙村寨、靳家寨、向陽寨、文侯村寨、尙文村寨、鞏村寨、成家莊寨、劉家莊寨、坡頭寨、南源寨、安家莊寨、湘子垣寨、上金莊寨、宋家莊寨、鎮集十有一，曰羅城鎮、永安鎮、仁岩村、冀村、見喜村、裴家會、田同鎮、三泉

鎮陽城鎮小相盡善

孝義縣西北三十里曰版谷關

縣舊志云漢文帝時置關戍守

縣西二十里曰白壁關北魏西河郡未置之前設軍壁六於狐岐山東重兵戍守以防匈奴五部餘衆散處離石者其壁曰辛壁賈壁白壁許壁柳壁此五壁胥統於大鎮故大鎮即名六壁唐之六壁府是也唐天復二年晉將周德威追朱友寧抵白壁關宋建隆四年孫延進李謙溥等師旋出白壁關次谷口俄敵至延進倉皇走谷中又袁繼忠護隰州屯兵白壁關破河東三寨

縣西南三十里曰賈願谷北魏於此置驛一名驛馬谷後兵亂遣賈願戍此故名

孝義縣堡七曰司馬堡仁智村堡西盤糧村堡吳屯村堡南姚堡仁道村堡高村堡寨五曰下柵寨六壁頭山寨下堡村寨兌九峪山寨三河口山寨

平遙縣南五十里曰普同關在普同谷口東南抵縣上關通沁源縣西抵關子嶺南入岳陽縣爲往來險要之地明洪武五年置巡檢司後移於縣北二十里洪善鎮今廢

平遙縣堡五曰洪善堡杜村堡侯冀堡郝同堡達蒲

堡寨二。曰趙壁山堡。西泉山堡。鎮集七。曰洪善鎮。上店鎮。寧固集。范洛集。朱圪集。長壽集。梁官集。

介休縣東南六十里。曰關子嶺。南通沁源。茂林峻嶺。地僻人稀。舊置關寨。明洪武五年。設巡檢司。轄弓兵三十名。防汛。天啟五年裁。

縣西南二十里。曰雀鼠谷。汾水由義棠鎮西南入谷。北周建德五年。帝至晉州。遣齊王憲率精騎二萬守雀鼠谷。隋大業十二年。太原留守唐公破甄翟兒於雀鼠谷。唐武德三年。秦王追宋金剛。至雀鼠谷。日中八戰。金剛走介州。官軍追之以餘衆二萬。出西門背城陣。方輿紀

要云。雀鼠谷。蓋當往來之要路。是也。

介休縣堡四十。曰南張堡。

卽張蘭鎮

郝家堡。田堡。北賈村

堡。北張里南堡。北張里中堡。北張里北堡。張原村堡。

大甫村南堡。曹麻村堡。義安村堡。胡龍堡。兩水村堡。

溫村堡。三嘉村堡。史村堡。張家堡。石河南堡。石河北

堡。仙臺堡。西段屯堡。宋安村堡。宋貼村堡。下莊堡。義

棠堡。馬安村堡。孫暢村南堡。孫暢村北堡。大宋曲東

堡。大宋曲西堡。湛泉堡。東內封堡。岳家灣堡。南靳屯

堡。城南上堡。城南下堡。梁家堡。羅王莊堡。閻家堡。趙

家堡。寨九。曰關子嶺寨。師屯寨。劉屯寨。龍頭寨。胡龍

寨仙臺寨史村寨興地東寨興地西寨鎮集六日城
市關廂張蘭鎮郝家堡湛泉鎮義棠鎮孔家堡

營汛

汾州營駐劄汾州府額設馬兵四十名步兵三百九十二名

舊額設馬軍百四十名步軍千五百五十九名
國朝額設馬戰兵二百名步戰兵三百名守兵五百名
康熙三十五年裁馬戰兵百四十六名步戰兵百四十二名守兵二百三十五名後又裁為今數凡馬步戰守兵每名月支米三斗每斗折銀一錢一分馬戰兵每名月

支餉銀二兩步戰兵一兩五錢守兵一兩馬每匹春

冬月支草六十束每束折銀一分料豆九斗撥在太原府大盈倉本色豆內

支領夏秋月支銀九錢

駐本營叅將一員守備一員外委一員隨營額外外委二員馬步兵二百二十六名餘分防各營汛

汾陽縣分汛設防三處北路三十里曰永安汛兵三名又北十

里為文水縣西路三十里曰向陽汛兵三名又三十里曰

嶺底汛兵三名又五里踰黃蘆嶺接永寧州

平遙縣外委一員額外外委一員轄兵五十一名分汛設防六處東北路七里曰五里莊汛兵五名又六里有奇

曰閻村汛兵五名又四里有奇曰洪善村汛兵六名又七

界曰閻村汛兵五名又四里有奇曰洪善村汛兵六名又七

頭汛兵五名又三里有奇東南路四十里曰坡底汛兵

名又南二十里接武鄉縣界

介休縣把總一員額外外委一員轄兵六十一名分汛

設防七處東北路六里有奇曰東十里舖汛兵五名又三

里有奇曰東十五里舖汛兵五名又十一里有奇曰東三

十里舖汛兵五名又七里曰東四十里舖汛兵五名又四里

曰郝張汛兵六名又六里有奇西南路六里曰西十里

舖汛兵五名又九里有奇曰西二十里舖汛兵十一名又

桑平略靈石縣界

孝義縣外委一員轄兵十名

臨縣外委一員轄兵三十四名分汛設防六處東南路

五十里曰三交汛兵三名又四十里曰石門汛兵三名又

為永寧州東北路六十里曰白文汛兵三名又北二十里

北路百二十里曰克虎寨汛兵五名北六十里至大略

西葭州界其南五十里曰郭家塌汛兵五名東北距城百里

縣界又南三十里曰高家塌汛兵五名東北距城九十里

永寧州把總一員轄兵四十名分汛設防九處東路四

十里曰王榮莊汛兵三名又二十里曰四皓汛兵三名又二

十里曰吳城汛兵三名又二十里曰三交汛兵三名又二

十里曰黃蘆嶺接汾西路五十五里曰寨東汛兵三名又二十五里曰

薛村汛兵三名又四十里曰後河底汛兵五名西北二十

里為軍鋪灣汛屬寧鄉縣所轄西越河

其北四十里曰孟門汛兵五名東

接陝西吳堡縣界二十里西越河

接吳堡縣界靖安營駐防河莊千總一員本營兵二十名所轄汛在

州界者八處東路距州城九十里曰廟底汛兵三名又東

五里曰白家漢汛兵三名又五里曰骨脊溝汛兵三名又十

五里曰黃帝廟汛兵三名東接西北路曰峪口汛兵三名東

至廟底汛又二十里曰橫泉汛兵三名又三十里曰津良

汛兵三名又三十五里曰方山汛兵三名西

石樓營駐劄石樓縣額設馬兵七名步兵百六十一名

駐本營都司一員把總一員外委一員馬步兵百三

十四名餘分防各營汛

石樓縣分汛設防五處東北路三十里曰圪連汛兵三名

又三十里曰倉兒原汛兵三名又十五里曰黃雲山汛兵三名

又二十五里至寧鄉縣郭家河汛西南路二十五里曰解莊汛又西南

至永和縣趙家溝汛南路二十五里曰關頭汛兵三名又南三十

沿河有汛六處轉角河汛花地窰汛閻家河汛並距

城九十里。温家山汛距城八十里。韋家畔汛距城九
十五里。崖頭汛距城百里。各設防兵四名。奉部文。冬
至下河。驚蟄回營。又舊汛四處。紅窰汛。土門汛。並距
城五十里。瓦舍汛距城八十里。裴溝汛距城六十里。
雍正三年裁。

寧鄉縣把總一員。轄兵二十名。分汛設防三處。南路六

十五里。曰郭家河汛。

兵五名。南接黃雲山汛。

西路百三十里。曰寨

裏汛。

兵五名。西越黃河。接陝西吳堡縣界。

其東北二十里。曰軍鋪灣汛。

兵五

名。西則黃河。此地跨入永寧州境。東南二十里。至永寧州之後河底汛。

驛鋪

東西通衢。由太原府祁縣賈令驛西南五十里。至府屬
平遙縣洪善驛。

洪善驛在縣東北二十五里。洪善鎮。雍正八年裁驛。

丞歸縣管轄。今所有額馬七十七匹。馬夫三十八名。

半廠夫九十名。

又西南八十里。至介休縣義棠驛。又西南八十里。至平

陽府靈石縣瑞石驛。

義棠驛舊在縣西南二十里。義棠鎮。明宏治二年移

於城北。國朝雍正八年裁驛丞。歸縣管轄。今所有

額馬七十七匹。馬夫三十八名。半廠夫九十名。介休

縣新志云驛馬馳驟必於中途四十里張蘭鎮少息或入夜則就坊店輪流派歇乾隆三十三年知縣王謀文於閒款內每年開支銀二十四兩賃店一所歇馬永不許派累各店

其非通衢驛站自洪善驛西八十里至汾陽縣汾陽驛汾陽驛承雍正四年裁夫馬歸縣管轄今所有額馬十二匹馬夫六名走遞損夫二十名自汾陽驛南至義棠驛六十里

又西九十里至永寧州吳城驛

吳城驛在州東八十里吳城鎮雍正十年裁驛承歸

州管轄今所有額馬六匹馬夫三名

又西八十里至玉亭驛

玉亭驛在州治東雍正六年裁驛承歸州管轄今所有額馬七匹夫三名半

又西六十里至青龍驛又西六十里至陝西吳堡縣河西驛

青龍驛在州西六十里青龍鎮雍正十年裁驛承歸州管轄今所有額馬五匹夫二名半
以上驛廠

汾陽縣總舖在三賢坊之西北路十里曰太平舖又十

里曰小相舖。又十里曰郭棚舖。即永安舖。又十里曰文星舖。

接文水縣。南路十里曰陽城舖。又五里接孝義縣。田屯

舖。東路十里曰瀕城舖。又十里曰康家堡舖。又十里接

平遙縣。白石舖。西路十里曰劉家莊舖。又十里曰坡頭

舖。又十里曰向陽舖。又三十里曰嶺底舖。又二十里接

永寧州三交舖。西六十里至州西具空線同

西通永寧州。實山蹊險徑。

平遙縣總舖。在縣治前之西。東北路十里曰仁內舖。又

十里曰洪善舖。接祁縣。西南路十里曰城西舖。又十里

曰陳村舖。又十五里接介休縣。田堡舖。西路十里曰達

蒲舖。又十五里曰寧固舖。又十五里曰香樂舖。又十里

曰白石舖。接汾陽縣。東南路十五里曰邢村舖。又十五

里曰辛村舖。又二十里曰上店舖。接武鄉縣。

自城西北行。經南政村。蔣堡。通文水縣。自城東南行。

經西郭村。坡底鎮。上店鎮。通武鄉縣。自城而南。經虎

壁村。胡村。梁趙村。七同村。馬壁村。窯頭村。太山神。通

沁源縣。自縣而西。經姚村。魏樂村。王智村。南官地村。

通孝義縣。而由太山神至沁源縣上鎮。為險要。

介休縣總舖。在縣治前之東。東北路十里曰宋牯舖。又

十里曰湛泉舖。又五里曰王里舖。又十五里曰南張舖。

又十里曰郝張鋪。又十里曰田堡鋪。接平遙縣西南路。五里曰內封鋪。又十五里曰義棠鋪。接靈石縣北路。由義棠鋪十里曰劉屯鋪。又十里接孝義縣王屯鋪。

自城南而西。經城南村河底村東歡村秦樹村。至旌介村。亦通靈石之小徑。自城東南行。經張良村焦寺村。西野村。至關子嶺沁源縣界。

孝義縣總鋪。在縣治前之西北路。十里曰田屯鋪。接汾陽縣南路。十五里曰王屯鋪。接介休縣西路。五十里曰布落鋪。又二十里曰南陽鋪。又十五里曰義棠鋪。又十五里曰盤重原鋪。又十五里曰車戶原鋪。又十里曰弓

家灣鋪。又四十里曰鳳尾鋪。又三十里接石樓縣蒼耳原。

自城東北行。八十里至平遙縣洪上驛。自城西北行五十里至布落鋪。轉東北。經梁家莊。接汾陽縣馬莊鋪。出布落鋪。轉西南。經南陽鋪。義棠鋪。盤重原。車戶原。弓家灣。通寧鄉縣南境。經寧鄉縣境內十五里。至曹家沿。復入縣境。又南十五里至鳳尾村。又西十五里至黃雲山。接石樓縣境。由盤重原而南。三十餘里。至劉家沿。通隰州西曲鎮。縣西岡巒重疊。而盤重原山勢平行。爲四達之要道。

臨縣總舖。在城南路二十里。曰關王舖。又三十里。曰三交舖。又二十里。曰鐘底舖。又二十五里。接永寧州石門舖。

廢舖南路二。曰安業。曰佛堂峪。俱通永寧州北路三。曰廟坪。曰白文。通興縣。曰陽坂。通嵐縣。西路三。曰白塔。曰兔兒坂。曰克虎寨。俱通陝西葭州。

自縣而北。經陳莊。郝家坡。至白文鎮。通興縣。縣西北。經清涼鎮。雷家磧。兔兒坂。至第八堡。黃河岸。北通興縣。西通葭州。由兔兒坂。西至克虎寨。黃河岸。由清涼鎮。石片頭。西至曲峪鎮。黃河岸。縣西。經安家莊。存羅

谷。至郭家塔。黃河岸。縣南。經三交鎮。轉西。過侯圪臺。至高家塔。皆通陝西葭州。由三交鎮。西南至磧口。黃河岸。西通吳堡縣。南通永寧州之孟門鎮。由三交鎮。東南經桃源。霍家嶺。至石門塢。通永寧州。越永寧州之北川。至郝塢山。通交城縣。自縣至石門塢六十里。又東百里。至郝塢山。縣東北百三十里。至一箭嶺。通靜樂。惟三交鎮。往永寧州之石門塢。爲孔道。然亦左右峻嶺高坂。非坦途。他皆山險小徑。石樓縣。解夫遞送。

舊未設舖。僱夫八名遞送公文。謂之解夫。

汾州府志 卷六 驛鋪
自城而北經孟家塌西衛村賀家塌裴溝村梁家山
至寧鄉縣界冀家原自城而西經王村坂橋村老子
王村井溝村石家坪留村霍家村越黃河通清澗縣
賀家畔自城西南行經蕭家塌任家莊瓦舍村延家
溝至永和關自城東北行經故鄉村汭口村坨連村
倉耳原至孝義縣鳳尾村自城而南經胡家峪賈家
溝塌崖村關頭村至隰州界羅兒溝自城而東經沙
窯村崔家莊曹村羅村紅窯村至隰州石口子鎮
永寧州總鋪在城東路十五里曰馬家鋪又十五里曰
義居鋪又十里曰北寒鋪又十里曰南寒鋪又十里曰

四皓鋪又二十里曰吳城鋪又十里曰三交鋪接汾陽
縣西北路二十里曰下安鋪又二十里曰大武鋪又二
十五里曰石門鋪接臨縣西路三十里曰白霜鋪又九
十里接陝西吳堡縣

廢鋪北路十曰漫塔曰唐家曰石佛曰峪口曰橫泉
曰監軍曰麻地曰方山曰土泥曰仁村接嵐縣西路
二曰賀家塔曰薛村接吳堡縣

由大武鋪而北經峪口鎮方山堡至赤堅嶺通嵐縣
由峪口鎮東北行至呂梁山通交城縣自城而西經
梁家漢池北至磧口黃河岸通臨縣由梁家漢斷道

塢至孟門鎮黃河岸自城而西經馬茂莊白霜鋪青龍鎮柳林鎮後河底越青龍渡通吳堡縣自城而南經交口村郝村金羅村至朱家店通寧鄉縣自城而東經盧橋村池北循谿澗至劉王嶂通交城。

寧鄉縣東路五十里曰康家塌鋪又五十里曰偏城鋪又四十里至府前。

廢鋪北路二十里曰朱家店接永寧州。

自城而北經龐家會尙家峪大高村朱家店通永寧州自城西北行經鋤溝鎮通永寧州由鎮轉西南行經三交原黃河岸通綏德州自城而西經賀家塢留

義村至石樓縣界裴溝自城而南經段家莊陳家灣萬年堡車明峪轉西歷水子溝薛家峪乾村煖泉鎮王家莊桑塘村至石樓縣界平底村自城東北行經郭家山朱家嶺至永寧州界南溝村自城而東經倉兒灣黑嶺坡峪村至汾陽縣界偏城村由萬年堡轉東南行經黃蒿嶺劉家坪至孝義縣界弓家灣。

以上鋪遞

道路附見

汾州府志卷之七

戶口

戶十九萬二千七十六口百二十七萬七千八百三十

四通計男婦大小口之數

明萬歷間戶四萬一千九百有一口五十二萬一千

二百二十六載在舊志時石樓縣不屬有靈石縣其後屢遭兵火

人民逃亡凋敝我朝休養百有餘年生齒日增於

昔乾隆三十四年編戶民數汾陽縣戶四萬九千九

百五十六男婦口二十八萬三千七百八十四子女

小口十五萬一千四百七十九平遙縣戶三萬三千

六百口十三萬一千九百二十小口七萬五千五十
介休縣戶六萬八千四百四十五口十七萬九千一
十二小口十九萬九千五百五十三孝義縣戶萬三
千四十八口二萬六千六百六十七小口七萬三千
四十二臨縣戶千七百一十口萬四千三百有五小
口萬七千二百八十七石樓縣戶五千五百六十一
口萬二千八十一小口萬五千五百二十九永寧州
戶萬五千六百有七口五萬六千九百七十四小口
萬七千九十七寧鄉縣戶四千一百四十九口萬一
千二百三十四小口萬二千八百二十

田賦

汾陽縣民地萬二百三十五頃五十畝七分一釐有奇
徵租課銀五萬六千六十兩九錢四分八釐有奇

明初原額地六千六百四十六頃四十一畝二分一
釐夏稅麥萬六千一百二石九斗九升五勺五撮秋
糧米三萬三千三百四十三石五斗四升三合二勺
六抄五撮至隆慶五年額地六千六百一十三頃三
十一畝二分五釐萬歷十一年定額萬有七十一頃

七十二畝二分八釐

舊志云此因奉例丈地遂多出

三釐舊制村坳民舍原無稅糧委官盡行文出兼及
荒山徙阪五穀不生之地是以虛有此數縣志載教

諭石炳云萬歷九年清查拋荒委官迎合邀功將磽确沙灘增開實數當事者遂令抵補澤潞沁遼邊倉而遼沁屬邑借蠹生奸復欲為彼保賠徭銀雖大參陳公諫議阻之而前項貽害至今徵夏稅

麥萬六千一百六十石八斗五升七合四勺二抄六撮六圭七粒八粟秋糧三萬二千四百五十六石二斗七升三勺七撮七圭徵絲絹三十三匹並折色及馬草驛站加徵每畝九釐銀共五萬五千三百六十九兩九錢六分八釐額外民田二十頃二十九畝四分徵折色銀六十四兩八錢六分一釐增豐贍庫夏秋糧及絲絹折色銀十七兩二錢八分九釐 國朝順治十二年以後至雍正六年續增額外地及河灘退

地共百四十一頃四十九畝三釐有奇徵折色銀六百一十七兩八錢三分

平遙縣民地萬有三百九十二頃五十八畝四分一釐徵租課銀六萬四千一百七十七兩八錢七分五釐

明初舊額官民地六千七百六十九頃四十八畝九分一釐萬歷五年查報荒地二百四十頃免徵九年至三十五年定額萬有一百四十三頃一十三畝三分夏稅三千八百五十七石一斗三升六合一勺秋糧四萬八千六百三十六石二斗五升二合一勺九撮並折色及絲絹馬草驛站地畝九釐銀共六萬三

汾州府志 卷七
千四十一兩六分九釐增豐贍庫夏秋糧及絲絹折
色銀百有一兩九錢四分二釐。國朝順治四年查
報汾水所占地五頃一十八畝免徵稅糧及各項折
色銀二十五兩九錢九分九釐十二年以後至雍正
七年續增額外地及河灘退地共百三十一頃八十
九畝五分六釐晉府更名田八頃共徵折色銀六百
四十兩三分三釐又歸併太原左衛屯田百一十四
頃七十二畝五分五釐徵折色銀四百二十兩八錢
二分八釐。

介休縣民地六千一百四十七頃五十三畝七分五釐
有奇。租課銀三萬四千八百一十二兩七錢一分八釐
有奇。

明初舊額官民地四千七百八十五頃。至嘉靖二十
八年額地四千七百九十五頃九十三畝六分三釐
一毫。萬曆三十五年定額六千二十頃三十二畝四
分一釐八毫。夏稅九百六十七石五斗六升八合六
勺二抄五撮。秋糧二萬六千五百二十三石五斗三
升九合三勺七抄三撮。並折色及絲絹馬草驛站地
畝九釐銀共徵三萬四千七十兩一錢三分一釐有
奇。增豐贍庫夏秋糧及絲絹馬草折色銀百六十兩

一錢七分六釐有奇。國朝康熙十六年至雍正七年續增額外地百二十七頃二十一畷三分四釐有奇。徵折色銀五百八十二兩四錢一分有奇。

孝義縣民地九千七百八十頃三十六畷四分七釐有奇。徵租課銀三萬五千九百七十四兩二錢六分六釐有奇。

明初舊額地三千九百四十九頃八十一畷嘉靖三

十一年額地三千九百一十九頃三十七畷四分萬

歷十年定額九千五十四頃一十七畷

舊志云萬歷十年清丈凡園場舍基舊不起科者搜括無遺本縣實徵原額夏包賠榆社稅糧一千四百二十三石五斗一升

稅五千三百四十七石四升六合八勺秋糧二萬一

千五十九石三斗三升二合三勺七抄二撮七圭並

折色及馬草驛站地畷九釐銀共三萬四千二百五

十七兩七錢四分四釐有奇增豐贍庫夏秋糧及絲

絹馬草折色銀十兩七錢四分三釐有奇。國朝順

治四年查報荒地九百頃十分畷之六免徵十年十

一年開墾復額康熙三年至雍正六年續增額外民

田屯田更名田河灘山隅地七百二十六頃一十九

畷四分七釐有奇及下坡地三十六垧共徵折色銀

千七百五兩七錢九分三釐有奇。

臨縣民地三千一百七十五頃八十九畝五分九釐有奇徵租課銀萬七千七十九兩六錢六分一釐有奇

明初舊額官民地共二千二百二十三頃六十七畝七分嘉靖二十五年額地二千二百四十八頃三十五畝二分萬歷九年至三十五年定額三千一百六十頃四十四畝四分九釐有奇夏稅四千三百三十八石五斗六升三合六勺五抄秋糧萬有一百五十二石四斗六升四勺五抄並折色及絲絹馬草驛站地畝九釐銀共萬六千九百四十四兩六錢六分七釐有奇萬歷間增豐贍庫夏秋糧及絲絹馬草折色

銀五十兩一錢二分九釐 國朝順治四年查報荒地四百四十頃六十八畝五分二釐免徵十年至十三年復額康熙十六年至雍正七年續增額外地及坡岡十五頃四十五畝一分徵折色銀八十四兩八錢六分五釐有奇

石樓縣民地千四百二十四頃四十二畝一分八釐徵租課銀八千五百八十二兩五分二釐有奇

舊額地二千七百五十九頃九十一畝五分順治四
年查報荒地千九百四十四頃五十九畝五分免徵
定額八百一十五頃三十二畝徵糧四千四百六十

六石四斗三勺四抄八撮二圭七粒折色及絲絹驛
站地晦九釐豐贍庫夏秋糧馬草共徵銀五千三兩
四錢一分七釐有奇九年至康熙十六年續增額外
山地六百九頃一十晦一分八釐徵折色銀三千五
百七十八兩六錢三分五釐有奇

永寧州民地四千五十五頃四十九晦一分八釐徵租
課銀二萬四千六兩一錢三分三釐有奇

明初舊額四千二百一十六頃六十二晦七分萬歷
十年定額四千六百九十八頃二十一晦二分七釐
五絲夏稅八千一百二十八石五斗六升一合五勺

秋糧萬八千九百四十六石六斗四升二合九勺

國朝順治間查報荒地二千一百四十一頃一晦六
分二釐免徵定額二千五百五十七頃一十九晦六
分五釐徵糧萬四千六百四十九石九斗九升八合
折色及絲絹驛站地晦九釐銀共萬五千四百九十
六兩六錢五分六釐有奇十二年至乾隆七年續增
額外民田更名田河灘山隅地千四百九十八頃二
十九晦五分三釐徵折色銀八千四百五十九兩二
錢四釐又歸併太原前衛屯糧折色牛糶銀五十兩
二錢七分三釐有奇

寧鄉縣民地五千八百三十三頃一十七畷八分九釐有奇。徵租課銀九千七十二兩八分七釐有奇。

明初地七千四百八十一頃三十七畷有奇。萬歷九年將山坡地每四畷折平地一畷起徵。至三十五年額地二千三百六十九頃八十二畷九分三釐一毫。夏稅三千一百八十四石七斗六升九合四勺五抄。秋糧七千四百三十一石一斗二升五合九勺。國朝初年額地四千一百二十二頃九十七畷三分。徵糧七千八百三石六斗五升九勺。折色及絲絹驛站地畷九釐銀共六千八百六十六兩三錢三分三釐。

順治十二年至雍正六年續增額外地千七百一十頃二十畷六分。徵折色銀二千二百一兩七錢三釐。以上地糧。

康熙五十二年欽奉 恩詔以五十年丁冊定為常額。續生人丁永不加賦。汾陽縣徵均徭銀萬二千二十一兩九錢九分二釐有奇。

行差人丁四萬八千四百一十三。徵均徭併辦買本色顏料加增銀共八千七百五十八兩五錢三分四釐。於乾隆十年奉文攤入地糧徵收。地差銀三千二百六十三兩四錢五分八釐。舊係按糧派徵。

平遙縣徵均徭銀九千二十五兩七錢七分一釐有奇
行差人丁五萬三千二百二十徵均徭等銀共八千
一百五十三兩九錢八分二釐內二千六百六十一
兩於乾隆元年奉文攤入地糧徵收又地差銀八百
六兩四錢三釐及歸併太原左衛屯丁八十九徵均
徭銀六十五兩三錢八分六釐有奇

介休縣徵均徭銀九千四百七十三兩四分五釐有奇
行差人丁六萬一千二百九十二徵均徭等銀共七
千三百二十四兩二分於乾隆元年奉文攤入地糧
徵收地差銀二千一百四十九兩二分五釐有奇舊

係按糧派徵

孝義縣徵均徭銀六千一百一十二兩四錢七分八釐
有奇

行差人丁萬四百八十六徵均徭等銀共二千六百
三十二兩三分地差銀三千三百五十三兩五錢五
分二釐有奇又歸併太原左衛屯丁百四十二徵均
徭銀百二十六兩八錢九分六釐有奇

臨縣徵均徭銀三千八百七十三兩五錢六分四釐有
奇

行差人丁三千七百六十二徵均徭等銀如額數於

乾隆二十三年奉文攤入地糧徵收。

石樓縣徵均徭銀千四百九十三兩三錢七釐有奇。

行差人丁三千三十八。徵均徭銀如額數。於乾隆三

十三年奉文攤入地糧徵收。

永寧州徵均徭銀五千二百八十七兩七分五釐有奇。

行差人丁八千四百八十七。徵均徭銀五千二百八

十七兩七分五釐有奇。額數內於乾隆二十四年奉

文開除故絕。朋丁並勻減丁銀二千八百七十九兩

八錢七分五釐。攤入地糧徵收。又歸併大原前衛屯

丁三十八。徵均徭銀十四兩九錢七釐有奇。

寧鄉縣徵均徭銀三千五百七十二兩一錢三分六釐有奇。

行差人丁二千七百七十。徵均徭等銀二千一百三

十七兩四分二釐有奇。於乾隆十年奉文攤入地糧

徵收。地差銀千四百三十五兩九分三釐有奇。舊係

按糧派徵。

以上丁徭。

額外匠價銀。汾陽縣二百五十二兩四錢五分。平遙縣

百二十一兩九錢五分。介休縣百五十一兩二錢。孝義

縣四十五兩四錢五分。臨縣三十五兩一錢。石樓縣八

兩一錢永寧州二十四兩七錢五分寧鄉縣四兩五分
並於乾隆三年奉文攤入地糧徵收。

酒課銀汾陽縣三百兩平遙縣二十五兩六錢五分介
休縣三十四兩九錢二分孝義縣五十兩臨縣五兩石
樓縣二兩永寧州二十兩寧鄉縣十兩商稅銀汾陽縣
千一百七十八兩四錢九分二釐平遙縣六十六兩五
錢三分三釐介休縣六百六十八兩六錢孝義縣四十
四兩三錢二分三釐臨縣五十六兩石樓縣五兩六分
五釐永寧州九十九兩八錢八分寧鄉縣十三兩五錢
二分六釐。

以上額外課稅

合府屬地糧丁徭及額外課稅共徵銀三十萬三千八
百五十九兩二分四釐

汾陽縣六萬九千八百一十三兩八錢八分三釐起
運各項下共四萬四千二百六十八兩九錢八分六
釐存支各項下共二萬五千五百四十四兩八錢九
分七釐平遙縣七萬三千四百一十七兩七錢七分
九釐起運四萬八千三百六十六兩五錢七分七釐
存支二萬五千五十一兩二錢二釐介休縣四萬五
千一百四十兩四錢八分四釐起運二萬七千九十

七兩五錢一分九釐存支萬八千四十二兩九錢六分五釐孝義縣四萬二千二百二十六兩五錢三分二釐起運三萬一千九百二十四兩一錢四分六釐存支萬有三百二兩三錢八分六釐臨縣二萬一千四十九兩三錢二分六釐起運萬五千九百三兩一錢四分一釐存支五千一百四十六兩一錢八分五釐石樓縣舊額萬一千一百三十三兩七錢五分內除缺額徭銀九百一十一兩七錢六分四釐又經費不敷銀百三十一兩四錢六分一釐實徵萬有九十九兩五錢二分五釐起運九千八十九兩一錢五分九

釐存支千一兩三錢六分六釐永寧州二萬九千四百五十二兩七錢四分五釐起運萬九千一百九十六兩八錢六分一釐存支萬二百五十五兩八錢八分四釐寧鄉縣萬二千六百六十七兩七錢五分起運九千四百一十五兩五錢三分八釐存支三千二百五十二兩二錢一分二釐

汾州衛屯田歸併於汾陽介休孝義三縣者共四十九頃七畝二分六釐徵租課銀百四十二兩三錢五分七釐其均徭併歸於汾陽孝義二縣者共徵銀二百六十二兩四錢九分五釐

汾陽縣歸併汾州衛屯田二十九頃九畷八分。徵折色銀七十六兩三錢九分三釐有奇。屯丁五百二十八。徵均徭銀二百九兩六分四釐有奇。共二百八十五兩四錢五分九釐。內起運二百七十九兩八錢一分四釐。存支五兩六錢四分五釐。介休縣歸併汾州衛屯田十五頃八十九畷六釐。徵折色銀五十三兩五錢六分三釐有奇。孝義縣歸併汾州衛屯田四頃八畷二分二釐。徵折色銀十二兩四錢。屯丁百二十。徵均徭銀五十三兩四錢三分一釐有奇。舊志汾州衛屯地六百七十三頃四十七畷二分八釐。該屯糧

二千四十一石八斗三升三合六勺一抄一撮三圭。內除拋荒糧六十九石七斗八升外。實徵糧一千九百七十二石五升三合六勺一抄一撮三圭五粒。每石折銀五錢。共徵銀九百八十六兩二分六釐四毫九絲四忽六微四纖。其地坐落汾陽介休孝義蒲大寧五縣。

雜稅彙解戶部者。據乾隆三十一年奏銷之數。汾陽縣千五百二十七兩五錢二分八釐。

徵房田稅契銀六百三十一兩三錢八分三釐。盈餘銀二百六十一兩三錢一分五釐。畜稅銀四百六十

兩四錢九分一釐盈餘銀二百六兩四錢三分九釐
烟稅銀百三十五兩九錢八分盈餘銀十六兩五錢
二分牙稅銀三百二十五兩四錢當稅銀四百九十
兩

平遙縣二千二百五兩三分六釐

徵房田稅契銀二百二兩二錢六分九釐盈餘銀二
百四十三兩三錢六分九釐溢額商稅銀三十六兩
三錢二分六釐畜稅銀二百五十九兩四錢四分盈
餘銀百二十一兩六錢三分二釐牙稅銀二百二十
二兩當稅銀千一百二十兩

介休縣二千八百四十兩一錢三分一釐

徵房田稅契銀五百九十八兩三錢八分三釐盈餘
銀五百一十四兩五錢二分七釐溢額商稅銀百七
十三兩四錢四分畜稅銀三百三十兩六錢三分六
釐盈餘銀二百四十二兩七錢四分五釐牙稅銀二
百兩四錢當稅銀七百八十兩

孝義縣千二百九十六兩七錢六分八釐有奇

徵房田稅契銀百九十八兩八錢七釐盈餘銀百三
兩九錢二釐溢額商稅銀六兩九錢九釐有奇畜稅
銀二百六十兩五錢二分盈餘銀二百二十五兩二

錢四分牙稅銀九十六兩二錢當稅銀四百五兩

臨縣五百四兩六錢五分

徵房田稅契銀三十四兩八錢九分四釐盈餘銀十

三兩四錢一分畜稅銀二百八兩四錢八分五釐盈

餘銀六十二兩五錢四分五釐又加增銀十一兩三

錢一分六釐牙稅銀十四兩當稅銀百六十兩

石樓縣百四十八兩三錢一分二釐

徵房田稅契銀二十七兩六錢四分五釐畜稅銀八

十五兩八錢八分四釐盈餘銀二十兩五錢八分三

釐牙稅銀九兩二錢當稅銀五兩

永寧州三百五兩二錢六分

徵房田稅契銀十三兩二錢六分畜稅銀八十二兩

二錢牙稅銀三十四兩八錢當稅銀百七十五兩

當四十座稅銀二百兩開除五座計稅二十五兩

寧鄉縣百六十六兩九錢一分五釐

徵房田稅契銀二十五兩九錢七釐盈餘銀十兩九

錢四分八釐畜稅銀三十二兩五錢八分三釐盈餘

銀二十八兩七分七釐牙稅銀十四兩四錢當稅銀

五十五兩

鹽稅

府屬一州七縣舊食鄰近土鹽雖領河東之引而不食其鹽惟輸稅於官謂之鹽稅行河東之引者三省曰山西曰河南曰陝西河南省

則南陽河南二府屬汝陝二州屬與許州之襄城皆行河東引食河東池鹽山西省惟平陽潞安澤州蒲州四

府屬解絳吉熙四州屬行河東引食河東池鹽太原汾州寧武三府屬遼沁忻代平定保德六州屬皆食本處

及附近土鹽領河東引而不食河東鹽名曰鹽稅陝西

省惟西安同州二府屬興安商華耀乾五州屬邠州及

所領三水淳化二縣領河東引食河東池鹽其鳳翔府

屬與邠州之長武食花馬池鹽名曰鳳課皆領河東引

而不食汾陽縣額行二千四百六十五引徵鹽稅銀九

河東鹽

百八十八兩七錢一分二釐有奇平遙縣額行二千九

百五十一引徵鹽稅銀千一百八十三兩六錢四分介

休縣額行二千九百一十二引徵鹽稅銀千一百六十

七兩八錢三分七釐有奇孝義縣額行五百五十三引

徵鹽稅銀二百二十一兩七錢七分六釐有奇臨縣額

行百九十五引徵鹽稅銀七十八兩一錢七分四釐石

樓縣額行五百二十引徵鹽稅銀二百一十五兩二分

有奇永寧州額行四百四十七引徵鹽稅銀百七十九

兩二錢二分四釐寧鄉縣額行百五十一引徵鹽稅銀

六十兩六錢三分七釐有奇

明萬歷間鹽課汾陽縣額發鹽票九千張每張稅銀

六分共銀五百四十兩平遙縣額發鹽票四千一百

張共銀二百四十六兩介休縣額發鹽票二千五百

張共銀二百四十六兩介休縣額發鹽票二千五百

張共銀二百四十六兩介休縣額發鹽票二千五百

張共銀二百四十六兩介休縣額發鹽票二千五百

張共銀百五十兩孝義縣額發鹽票千三百張共銀七十八兩臨縣額發鹽票六百張共銀三十六兩永寧州額發鹽票六百張共銀三十六兩寧鄉縣額發鹽票二百張共銀十二兩載在舊志石樓縣洪武初額發鹽票六百六十張共銀三十九兩六錢載在縣舊志考引之名始於宋其用引之法卽池驗券按數而出元時每鹽一引重四百斤明初如之後分一引爲二引國朝順治二年立河東鹽法時巡鹽御史奏稱陝西之平涼慶陽乃食花馬小池鹽山西太原汾州乃食本地煎鹽舊皆河東所轄以其與河東相

近也十三年因議均引目下巡鹽御史酌覆御史朱紱覆稱合照賦役全書丁口數目令各省布政司將領引額丁通盤打算均勻派銷未經均定而御史焦毓瑞以河南俱食解池商鹽易於均派其山西太原汾州遼沁例食本地土鹽食解鹽者平陽潞安二府一府興安一州凡行解池商鹽州縣止有督銷之責而納課之責在商若行土鹽并花馬池鹽之處則銷引納課之責成併在州縣部議遵定派引刊冊以永遵守康熙十年御史布舒疏請汾州府七屬俱食本

地土鹽獨有石樓一縣行銷解鹽道路阻長行運維艱請照改土鹽商民兩便部議自十二年準其改食於是府屬之一州七縣悉爲派徵鹽稅矣六十二年介休縣知縣蕭蕙以民旣輸鹽稅仍設商人於民不便且巡丁橫行窮簷愁怨得請廢商雍正八年知府張學林因汾陽縣商人巡丁大爲民害亦得請廢商而同知馮雲燦權知府事有按糧攤課之請九年知府崔應階知縣林中柟遂議將鹽課紙價銀攤入地丁項內每正糧一兩攤課一分五釐乾隆二十八年奉布政司檄稱代州交城壽陽三屬鹽課並無商販俱征之民已

經攤入地丁統征分解民甚稱便惟文水太谷汾陽平遙介休孝義石樓永寧寧鄉孟縣保德河曲等十二州縣雖經攤入地丁並未歸併統征分解係令里老催收或派甲頭彙納以致暗中加派額外浮征貧窮小民不免苦累應俱倣照代州交城壽陽之例歸於地丁項下統爲征收分欵起解前此汾陽縣地丁內攤徵鹽課其平餘銀每鹽課一兩加平餘銀一分五釐尙未歸併至是年知縣顧學潮請正課與平餘雖有分欵寔止一項應統算攤征於地丁項每一兩攤征鹽課紙價及平餘共一分五釐三毫六絲三忽四微乃以二十九年爲始由此豪右因緣爲奸侵

刻小民之弊永絕

一	二	三	四	五	六	七	八	九	十
...

[The left page of the manuscript is mostly blank, showing the texture of the aged paper and some minor foxing or staining.]

